

氏族典第二百六十六卷

王姓部列傳十四

遼 王郁

按遼史王郁傳郁京兆萬年人唐義武軍節度使處直之孽子伯父處存鎮義武卒三軍推其子郃襲處直逐郃郃奔太原亂兵推處直爲留後遣人請事梁王梁表處直爲義武軍節度使初郃之亡也郁從之晉王克用妻以女用爲新州防禦使處直料晉必討張文禮鎮亡則定不獨存陰使郁北導契丹入塞以牽晉兵郁大喜神冊六年奉表送款舉室來降太祖以爲養子從太祖平渤海戰有功加同政事門下平章事改崇義軍節度使太祖崩郁與妻會葬其妻泣訴於淳欽皇后求歸鄉國許之郁奏曰臣本唐主之壻主已被弑此行夫妻豈能相保願常侍太后后喜曰漢人中惟王郎最忠孝尋加政事令還宜州卒

王白

按遼史王白傳白冀州人明天文善卜筮晉司天少監太宗入汴得之應曆十九年王子只沒以事

古今圖書集成
下獄其母求卜曰此人當王未能殺也毋過憂景宗卽位釋其罪封寧王竟如其言凡決禍福多此類保寧中歷彰武興國二軍節度使撰百中歌行於世

王繼恩

按遼史王繼恩傳繼恩棣州人睿知皇后南征繼恩被俘初皇后以公私所獲十歲已下兒容貌可觀者近百人載赴涼陁並使閹爲豎繼恩在焉聰慧通書及遼語擢內侍左廂押班聖宗親政累遷尙衣庫使左承宣監門衛大將軍靈州觀察使內庫都提點繼恩好清談不喜權利每得賜賚市書至萬卷載以自隨誦讀不倦每宋使來聘繼恩多充宣賜使後不知所終

王繼忠

按遼史王繼忠傳繼忠不知何郡人仕宋爲鄆州刺史統和二十一年宋遣繼忠屯定之望都以輕騎覘我軍耶律奴瓜等獲之太后知其賢授戶部使以康默記族女女之繼忠亦自激昂事必盡力宋以繼忠先朝舊臣每遣使必有附賜聖宗許受之二十二年宋使來聘遣繼忠弧矢鞭策及求和劄子詔繼忠與宋使相見許講和五年爲漢人行宮都部署封琅邪郡王六年進楚王賜國姓拜樞

密使太平三年致仕卒子懷玉仕至防禦使

王觀

按遼史王觀傳觀南京人博學有才辨重熙七年中進士乙科興宗崩充夏國報哀使還除給事中咸雍初遷翰林學士兼乾文閣學士七年改南樞密副使賜國姓叅知政事兼知南樞密事坐矯制修私第削爵爲民卒

王棠

按遼史王棠傳棠涿州新城人博古善屬文重熙十五年擢進士鄉貢禮部廷試對皆第一累遷上京鹽鐵使或誣以賄無狀釋之遷東京戶部使大康二年遼東飢民多死請振恤從之三年入爲樞密副使拜南府宰相大安末卒棠練達朝政臨事不怠在政府修明法度有聲

王鼎

按遼史王鼎傳鼎字虛中涿州人幼好學居太寧山數年博通經史時馬唐俊有文名燕薊間適上已與同志祓禊水濱酌酒賦詩鼎偶造席唐俊見鼎樸野置下座欲以詩困之先出所作索賦鼎援

筆立成唐俊驚其敏妙因與定交清寧五年擢進士第調易州觀察判官改漆水縣令累遷翰林學士當代典章多出其手上書言治道十事帝以鼎達政體事多咨訪鼎正直不阿人有過必面詆之壽隆初陞觀書殿學士一日宴主第醉與客忤怨上不知己坐是下吏狀聞上大怒杖黥奪官流鎮州居數歲有赦鼎獨不免會守臣召鼎爲賀表因以詩貽使者有誰知天雨露獨不到孤寒之句上聞而憐之卽召還復其職乾統六年卒鼎宰縣時憩於庭俄有暴風舉臥榻空中鼎無懼色但覺枕榻俱高乃曰吾中朝端士邪無干正可徐置之須臾榻復故處風遂止

宋一 王祚

按宋史王溥傳溥父祚爲郡小吏有心計從晉祖入洛掌鹽鐵案以母老解職歸漢祖鎮并門統行營兵拒契丹委祚經度芻粟卽位擢爲三司副使歷周爲隨州刺史移刺商州顯德初置華州節度以祚爲刺史歷鄭州團練使宋初升宿州爲防禦以祚爲使因求致政至闕下拜左領軍衛上將軍致仕

王格

按宋史王侁傳侁父朴朴弟格宋初爲右補闕直史館至都官員外郎廣南轉運使

王溥

按宋史王溥傳溥字齊物并州祁人漢乾祐中舉進士甲科爲祕書郎時李守貞據河中趙思綰反京兆王景崇反鳳翔周祖將兵討之辟溥爲從事河中平遷太常丞從周祖鎮鄴廣順初授左諫議大夫樞密直學士二年遷中書舍人翰林學士三年加戶部侍郎改端明殿學士周祖疾革召學士草制以溥爲中書侍郎平章事顯德四年丁外艱起復表四上乞終喪世宗太怒宰相范質奏解之溥懼入謝六年夏命叅知樞密院事恭帝嗣位加右僕射宋初進位司空罷叅知樞密院乾德二年罷爲太子太保五年丁內艱服闋加太子太傅開寶二年遷太子太師太平興國初封祁國公七年八月卒贈侍中諡文獻溥性寬厚美風度好汲引後進其所薦至顯位者甚衆子貽孫貽正貽慶貽序貽正至國子博士貽慶比部郎中貽序景德二年進士後改名貽矩至司封員外郎貽正子克明尙太宗女鄭國長公主改名貽永

王審琦

按宋史王審琦傳審琦字仲寶其先遼西人後徙家洛陽漢乾祐初隸周祖帳下廣順中歷內殿直都知鐵騎指揮使從世宗征劉崇力戰有功遷都虞候領勤州刺史世宗圍濠州審琦率敢死士拔其水砦奪月城及攻楚州爲南面巡檢城將陷審琦意准人必遁設伏擊之斬數千級淮南平改鐵騎右廂都校又從平瓦橋關恭帝卽位遷殿前都虞候宋初擢爲殿前都指揮使領泰寧軍節度建隆二年出爲中正軍節度在鎮八年爲政寬簡開寶二年從征太原六年與高懷德並加同平章事七年卒審琦素不能飲嘗侍宴太祖酒酣仰祝曰酒天之美祿審琦朕布衣交也方與朕共享富貴何靳之不令飲邪祝畢顧謂審琦曰天必賜卿酒量試飲之勿憚也審琦受詔飲十杯無苦自此侍宴常引滿及歸私家卽不能飲或強飲輒病

王彥昇

按宋史王彥昇傳彥昇字光烈善擊劍號王劍兒本蜀人後唐同光中蜀平徙家洛陽初事宦官孟漢瓊漢瓊以其趨勇言于明宗補東班承旨晉天福中轉內殿直周廣順中從向拱破太原兵虎亭南以功遷都虞候領合州刺史世宗征淮南從劉崇進宋偃破金牛水砦又從張永德攻瀛州改散

員都指揮使太祖北征至陳橋爲衆推戴彥昇以所部先入京遇韓通於路逐至第殺之初太祖誓軍入京不得有秋毫犯及聞通死意甚不樂以建國之始不及罪彥昇拜恩州團練使後爲京城巡檢中夜詣王溥第溥出旣坐乃曰此夕巡警甚困聊就公一醉耳彥昇意在求賄溥佯不悟置酒數行而罷翌日溥密奏其事乃出爲唐州刺史開寶二年改防州防禦使是冬又移原州西人有犯漢法者彥昇不加刑召僚屬飲宴引所犯以手摔斷其耳大嚼卮酒下之其人流血被體股慄不敢動前後啗者數百人西人畏之不敢犯塞七年以病代還卒

王景

按宋史王景傳景萊州掖人善騎射不事生業結里中惡少爲羣盜梁將王檀鎮滑臺以景隸麾下莊宗入汴景來降累遷奉聖都虞候晉祖天福初授相州刺史少帝幸澶淵景與高行周等大破契丹衆于戚城拜橫海軍節度漢乾祐初加同平章事周祖微時與景善及卽位加兼侍中景起身行伍素無智略然臨政不尙刻削廣順初入朝民數百人遮道留之不獲有截景馬鐙者俄以景爲護國軍節度歲餘遷鎮鳳翔世宗卽位加兼中書令恭帝卽位進封涼國公宋初加太保封太原郡王

四年卒贈太傅諡元靖初景之奔晉也妻坐戮二子逃獲免晉祖待之厚賞賜萬計嘗問景所欲對曰臣昔爲卒屢過官妓侯小師家意甚慕之今妻被誅誠得小師爲妻足矣晉祖大笑卽以小師賜景後封楚國夫人侯氏嘗盜景金數百兩私遺舊人景知而不責子廷義廷睿廷訓

王晏

按宋史王晏傳晏徐州滕人少壯勇無賴嘗率羣盜行劫後唐同光中應募隸禁軍累遷奉國小校晉開運末與趙暉侯章等戍陝州會契丹至汴遣其將劉愿據陝恣行暴虐晏與暉等謀斬愿首縣府門外遣其子漢倫奉表晉陽時漢祖雖建號威聲未振得晏等來歸甚喜卽日以晏爲絳州防禦使遷建雄軍節度漢祖入汴加同平章事周祖卽位加兼侍中以晏家彭城授武寧軍節度俾榮其鄉里世宗卽位加兼中書令初晏至鎮悉召故時同爲盜者遺以金帛置酒語之曰吾鄉素多盜我與諸君昔嘗爲之後來者固當出諸君之下爲我告諭令不復爲若不能改吾必盡滅其族由是境內安靜吏民詣闕舉留請爲晏立衣錦碑顯德三年移鳳翔節度太祖卽位封趙國公乾德元年進封韓國公拜太子太師致仕卒贈中書令

王彥超

按宋史王彥超傳彥超大名臨清人少事後唐魏王繼岌從至渭南會明宗卽位繼岌遇害彥超乃依鳳翔重雲山僧舍暉道人爲徒時晉祖帥陝召至帳下委以心腹天福初累遷奉德軍校漢初領岳州防禦使從周祖入汴會革命拜彥超武寧軍節度與樞密使王峻拒劉崇于晉州改河陽三城節度移鎮河中顯德初加同平章事宰相李穀征淮南以彥超爲前軍行營副部署敗淮南軍于壽州恭帝嗣位加檢校太師宋初兼中書令代還太平興國六年封邠國公致仕雍熙三年卒贈尙書令孫克從咸平元年進士及第

王繼濤

按宋史王繼濤傳繼濤河朔人少給事漢祖左右乾祐初補供奉官仕周爲右武衛大將軍顯德五年遷和州刺史宋初爲左驍騎大將軍乾德二年隨大軍伐蜀俄以爲彭州刺史緜州軍亂攻彭州繼濤拒之身被八槍單騎至成都素與通事舍人田欽祚有隙會欽祚入朝乃誣奏繼濤以他事太祖驛召繼濤將面質之道病卒

古今圖書集成
王全斌

按宋史王全斌傳全斌并州太原人其父事莊宗爲岢嵐軍使以全斌爲質因隸帳下及莊宗入洛累歷內職同光末國有內難兵入宮城近臣宿將皆棄甲遁去惟全斌與符彥卿等十數人居中拒戰莊宗中流矢扶掖至絳霄殿全斌慟哭而去明宗卽位補禁軍列校晉初以功遷護聖指揮使周廣順初爲右廂都指揮使宋初以功拜安國軍節度乾德二年冬又爲忠武軍節度卽日下詔伐蜀命全斌爲西川行營前軍都部署由鳳州路進討召示川陝地圖授以方略十二月率兵拔乾渠遂下興州至嘉陵分兵治閣道度桔柏江遂克利州趨劍門四年正月師次魏城孟昶遣使奉表來降旬餘劉延讓等至兩路兵相嫉蜀人亦搆主帥遂不協俄詔發蜀兵赴闕人給錢十千未行者加兩月廩食全斌等不卽奉命由是蜀軍憤怨至綿州叛有蜀交州刺史全師雄者常爲將士卒畏服適以其族赴闕下爲亂兵所獲推爲主帥成都十縣皆起兵應師雄未幾曹彬破師雄之衆于新繁師雄病死賊衆始息召還全斌責授崇義軍節度觀察留後開寶末車駕幸洛陽郊祀召全斌侍祠以爲武寧軍節度謂之曰朕以江左未平慮征南諸將不遵紀律故抑卿數年爲朕立法今已克金陵

遷卿節鉞全斌至鎮數月卒子審鈞富州刺史審銳供奉官閤門祇候曾孫凱

王仁贍

按宋史王仁贍傳仁贍唐州方城人少倜儻不事生產委質刺史劉詞詞遷永興節度署爲牙校詞將卒遺表薦仁贍材可用太祖素知其名請於世宗以隸帳下宋初授武德使出知秦州改左飛龍使建隆二年遷右領軍衛將軍充樞密承旨高繼冲請命以仁贍爲荆南巡檢使繼冲入朝命知軍府乾德初遷左千牛衛大將軍二年召赴闕擢爲樞密副使七月加左衛大將軍興師討蜀命仁贍爲鳳州路行營前軍都監蜀平坐沒入生口財貨殺降兵致蜀土擾亂責授右衛大將軍帝幸洛以仁贍判留守司三司及召沈倫赴行在以仁贍爲東京留守駕還遂判三司俄命權宣徽北院事太平興國初拜北院使加檢校太保四年親征太原充大內部署總轄裏外巡檢司公事師還加檢校太傅五年車駕北巡仁贍爲大內部署七年春以政事與僚屬相矛盾爭辯帝前仁贍辭屈責授右衛大將軍翌日改唐州防禦使仁贍既失權勢因怏怏成疾數日卒子昭雍爲崇儀副使

王仁鎬

按宋史王仁鎬傳仁鎬邢州龍岡人後唐明宗鎮邢臺署爲牙校卽位擢爲作坊副使累遷西上閤門使晉天福中爲護國軍行軍司馬漢乾祐中歷昭義天雄二軍節度副使周祖鎮鄴表仁鎬爲副留守及起兵仁鎬預其謀顯德初出爲永興軍節度使世宗嗣位移河中五年拜安國軍節度制曰眷惟襄國實卿故鄉分子龍節之權成爾錦衣之美郡民扶老攜幼迎於境上有獻錦袍者四仁鎬皆重衣之省其父祖墓周視松檟涕泗嗚咽郡有羣盜仁鎬遣使遣以束帛諭之悉遁去恭帝嗣位移山南東道節度宋初加檢校太師建隆二年以疾召還卒於傳舍

王暉

按宋史李萬全傳王暉太原人性吝嗇貲甚富而妻子飯疏糲縱部曲誅求民甚苦之世宗以先朝功臣知而弗問焉至右神武統軍建隆四年終右領軍衛上將軍

王易簡

按宋史王易簡傳易簡字國寶京兆萬年人曾祖肅唐劍州刺史祖遠連州刺史父貫唐州刺史易簡少好學工詩梁乾化中舉進士明年遂擢第復隱華山後唐同光中遣魏王繼岌伐蜀辟爲巡官

改記室參軍明宗卽位羅周恭辟爲掌書記府罷退居華陰秦王從榮聞而重之召爲祠部員外郎知制誥府中書舍人晉初判史館事三拜御史中丞判吏部銓廣順初遷禮部尙書顯德四年告老以太子少保致仕宋初召加少傅建隆四年卒

王著

按宋史王著傳著字成象單州單父人性豁達無城府幼能屬文漢乾祐中舉進士周廣順中世宗鎮澶州辟觀察支使隨世宗入朝遷殿中丞卽位拜度支員外郎顯德三年充翰林學士六年丁家艱起復恭帝嗣位加金部郎中知制誥宋初加中書舍人建隆二年知貢舉四年春宿直禁中被酒髮倒垂被面夜扣滋德殿門求見帝怒發其醉宿娼家之過黜爲比部員外郎乾德初改兵部員外郎二年復知制誥數月加史館修撰判館事三年就轉戶部郎中六年復爲翰林學士加兵部郎中再知貢舉開寶二年冬暴卒著少有俊才善與人交好延譽後進當世士大夫稱之

王祐

按宋史王祐傳祐字景叔大名莘人祖言仕唐黎陽令父徹舉後唐進士至左拾遺祐少篤志詞學

性倜儻有俊氣晉天福中以書見桑維翰稱其藻麗由是名聞京師鄴帥杜重威辟爲觀察支使仕周歷魏縣南樂二令太祖受禪拜監察御史由魏縣移知光州遷殿中侍御史乾德三年知制誥六年加集賢院修撰轉戶部員外郎知潞州召還會符彥卿鎮大名頗不治太祖以祐代之繼以用兵嶽表徙知襄州湖湘平移知潭州台還攝判吏部銓盧多遜素惡祐不比己出爲鎮國軍行軍司馬太平興國初移知河中府入爲左司員外郎拜中書舍人充史館修撰未幾知開封府以病請告太宗謂祐文章清節兼著特拜兵部侍郎月餘卒子三人懿旦旭

王貴

按宋史王貴傳貴并州太原人廣順初補衛士宋初累遷至散員都指揮使領勝州刺史太平興國二年出爲淄州刺史受詔從潘美北征攻沁州頗立戰功及從楊業爲遼兵所圍親射殺數十人矢盡又擊殺數人遂遇害擢其子文晟供奉官文昱殿直

王明

按宋史王明傳明字如誨大名成安人晉天福中舉進士不第驍騎將藥元福辟爲從事周廣順初

奏署判官顯德初元福移鎮陝恃功多驕恣明以直道規之忤其左右因謝絕之詣闕上書求任州縣歷清平鄆城二令乾德初舉清白有吏幹者召爲左拾遺蜀平選知榮州代歸遷右補闕會用兵於嶺南選爲荆湖轉運使開寶三年大舉南征以明爲隨軍轉運使供億不闕旣而賀州未下明入與主帥計曰當急取之諸將猶豫明乃擐甲宵率所部堙其塹直抵城門城中懼納款遂據有之因抵廣州廣州平爲本道轉運使俄以潘美爲嶺南轉運使以明爲副七年代歸是歲將用師南唐以明爲黃州刺史金陵平詔明安撫諸郡太宗卽位兼領江南諸路轉運使召爲諫議大夫遷給事中出知并州端拱元年代還改禮部侍郎知真定府淳化初歸闕二年卒

王晉卿

按宋史王晉卿傳晉卿河朔人周世宗在澶淵以武藝求見得隸帳下及卽位補東頭供奉官從戰高平征淮南每遣宣傳密旨甚親信之顯德四年領彭州刺史恭帝卽位出爲賓州刺史乾德中爲興州刺史四年移漢州時蜀初平寇盜充斥晉卿嚴武備設方略禽捕剪滅靡有遺漏賊無敢窺其境然以賄聞太祖惜其才而不問開寶四年授莫州刺史六年卒

卷一百一十五

其後陳述四學...

...

...

...

...

...

...

...

...

...

...